

«ՀԱՍՏԱՏՎԱԾ Է»
«ԿԱՄՍԵՐՁ» ՈՒՎԿ ՓԲԸ-ի
Խորհրդի 2026թ.մարտի 04-ի
որոշմամբ /արձանագրություն N 07/26/

Խորհրդի նախագահ

Ա. Չաղարյան

A. Chagh.
/ստորագրություն/



Շահութաբաժնային քաղաքականություն

ԵՐԵՎԱՆ 2026

1. Ընդհանուր դրույթներ

1.1. Կարգավորման շրջանակը.

Շահութաբաժնային քաղաքականությունը սահմանում է «Կամույջ» ՈՒՎԿ ՓԲԸ (այսուհետ՝ Ընկերություն) կողմից հասարակ (սովորական) բաժնետոմսերի շահութաբաժինների բաշխման նպատակները, սկզբունքները, շահութաբաժինների վճարման կարգն ու պայմանները, շահութաբաժինների վերաբերյալ որոշումներ ընդունող մարմինների միջև իրավասությունների և պարտականությունների բաշխումը:

1.2. Կիրառման շրջանակը.

- Բաժնետերերի Ընդհանուր Ժողով,
- Խորհուրդ,
- Գործադիր մարմին (տնօրեն),
- Շահութաբաժինների վճարման գործառույթներ իրականացնող ստորաբաժանումներ:

1.3. Կարգավորող փաստաթղթեր.

- «Վարկային կազմակերպությունների մասին» ՀՀ օրենք,
- «Բաժնետիրական ընկերությունների մասին» ՀՀ օրենք,
- ՀՀ կենտրոնական բանկի նորմատիվ իրավական ակտեր,
- Ընկերության կանոնադրություն,
- Ընկերության Ռազմավարական զարգացման ծրագրի:

2. Նպատակները և սկզբունքները

2.1. Քաղաքականության նպատակները.

- 2.1.1. Ապահովել Բաժնետերերի համար շահութաբաժնային ընդունելի մակարդակ, որը լավագույնս կհավասարակշռի բաժնետերերի և Ընկերության շահերը:
- 2.1.2. Ապահովել Ընկերության ռազմավարական զարգացման ծրագրի իրականացումը, կատարողականի անհրաժեշտ ցուցանիշները:
- 2.1.3. Ապահովել անհրաժեշտ պայմաններ, որոնք թույլ կտան Ընկերությանը մնալ մրցունակ, շահութաբեր և գրավիչ ներդրողների և ֆինանսավորողների համար:

2.2. Քաղաքականության սկզբունքները.

- 2.2.1. Շահութաբաժինների վճարման որոշումները կայացվում են ՀՀ օրենսդրությամբ, Ընկերության կանոնադրությամբ և ներքին իրավական ակտերով սահմանված պահանջներին համապատասխան:
- 2.2.2. Շահութաբաժինները բաշխում են Ընկերության չբաշխված զուտ շահույթից, որը հաշվարկվում է՝ օրենսդրությամբ սահմանված պահանջներին համապատասխան:
- 2.2.3. Շահութաբաժինների բաշխման որոշումների ընդունումը և վճարումն իրականացվում են Ընդհանուր ժողովի, Խորհրդի, Գործադիր մարմնի և ներգրավված ստորաբաժանումների միջև իրավասությունների և պարտականությունների բաշխման սկզբունքով:
- 2.2.4. Ընկերությունը պետք է պահպանի կապիտալի համարժեքության բավարար մակարդակ՝ ռազմավարական ծրագրով նախատեսված Ընկերության զարգացումն ապահովելու համար:
- 2.2.5. Ընկերությունը չի երաշխավորում շահութաբաժինների վճարումները, և կարող է շահութաբաժիններ չվճարելու մասին որոշում ընդունել:

3. Շահութաբաժինների բաշխման կարգը, սահմանափակումները

3.1. Որոշումների ընդունում.

- 3.1.1. Տարեկան շահութաբաժինների բաշխման որոշումը Խորհրդի առաջարկությամբ ընդունում է Ընդհանուր ժողովը: Բաշխման որոշմամբ Ընդհանուր ժողովը սահմանում է բաշխման ենթակա շահութաբաժինների չափը, դրանց վճարման կարգն ու ժամկետները:
- 3.1.2. Միջանկյալ (եռամսյակային կամ կիսամսյակային) շահութաբաժինների վճարման մասին որոշումն ընդունում է Խորհուրդը՝ սահմանելով շահութաբաժինների չափը, դրանց վճարման կարգն ու ժամկետները: Ընդ որում միջանկյալ շահութաբաժինների վճարման ժամկետը պետք է լինի ոչ շուտ, քան որոշման ընդունման պահից 30 օր հետո:
- 3.1.3. Շահութաբաժինների յուրաքանչյուր վճարման համար Խորհուրդը կազմում է շահութաբաժիններ ստանալու իրավունք ունեցող բաժնետերերի ցուցակ, որում պետք է ընդգրկվեն՝
- ա) միջանկյալ շահութաբաժիններ վճարելու դեպքում՝ այն բաժնետերերը, որոնք ընդգրկվել են բաժնետերերի ռեեստրում Խորհրդի՝ միջանկյալ շահութաբաժիններ վճարելու որոշման կայացման օրվանից առնվազն 10 օր առաջ,
 - բ) տարեկան շահութաբաժիններ վճարելու դեպքում՝ այն բաժնետերերը, որոնք ընդգրկվել են բաժնետերերի ռեեստրում՝ Բաժնետերերի Տարեկան Ընդհանուր ժողովին մասնակցելու իրավունք ունեցող բաժնետերերի ցուցակը կազմելու օրվա դրությամբ:

3.2. Սահմանափակումներ.

- 3.2.1. Շահութաբաժինների չափը չի կարող գերազանցել համապատասխան ժամանակաշրջանի վերջի դրությամբ Ընկերության չբաշխված զուտ շահույթի 75 տոկոսը:
- 3.2.2. Միջանկյալ շահութաբաժինների չափը չի կարող գերազանցել նախորդ ֆինանսական տարվա արդյունքներով բաշխված շահութաբաժինների 50 տոկոսը, ինչպես նաև վճարման պահի դրությամբ չբաշխված զուտ շահույթի 75 տոկոսը:
- 3.2.3. Տարեկան շահութաբաժինների չափը չի կարող պակաս լինել այդ տարվա համար արդեն վճարված միջանկյալ շահութաբաժինների չափից:
- 3.2.4. Եթե Ընդհանուր ժողովի որոշմամբ տարեկան շահութաբաժինների սահմանված չափը հավասար է արդեն վճարված միջանկյալ շահութաբաժինների չափին, ապա տարեկան շահութաբաժիններ չեն վճարվում:
- 3.2.5. Եթե Ընդհանուր ժողովի որոշմամբ տարեկան շահութաբաժինների չափը սահմանվում է արդեն վճարված միջանկյալ շահութաբաժինների չափից ավելի, ապա տարեկան շահութաբաժինները վճարվում են սահմանված տարեկան շահութաբաժնի և տվյալ տարվա համար արդեն վճարված միջանկյալ շահութաբաժինների գումարի տարբերությամբ:
- 3.2.6. Շահութաբաժինների բաշխումը արգելվում է հետևյալ դեպքերում.
- ա) շահութաբաժինների բաշխման որոշումն ընդունելու պահի դրությամբ Ընկերության վիճակը համապատասխանում է օրենքով սահմանված անվճարունակության (սնանկության) հայտանիշներին, կամ դրանք ի հայտ կգան շահութաբաժինների վճարման հետևանքով.
 - բ) Ընկերության զուտ ակտիվների արժեքը պակաս է կանոնադրական կապիտալից կամ կպակասի շահութաբաժինների վճարման հետևանքով:

- գ) շահութաբաժինների բաշխման պահին Ընկերության կրած կորուստները (վնասները) հավասար են կամ գերազանցում են այդ պահին առկա չբաշխված զուտ շահույթի գումարը,
- դ) ամբողջությամբ համալրված չէ կանոնադրական կապիտալը,
- ե) շահութաբաժինների բաշխումը կհանգեցնի կամ կարող է հանգեցնի Ընկերության ֆինանսական վիճակի վատթարացմանը,
- զ) շահութաբաժինների բաշխման հետևանքով խախտվում է կամ կարող է խախտվել առնվազն մեկ տնտեսական նորմատիվ,
- է) եթե շահութաբաժինների բաշխման արդյունքում կապիտալի համարժեքության ցուցանիշը կնվազի Ընկերության կողմից սահմանված ներքին թիրախային մակարդակից ցածր:
- ը) ՀՀ կենտրոնական բանկը սահմանափակել կամ արգելել է Ընկերության կողմից շահութաբաժինների բաշխումը,
- թ) ՀՀ օրենսդրությամբ և/կամ Ընկերության կանոնադրությամբ սահմանված այլ դեպքերում:

3.3. Շահութաբաժինների վճարման կարգը.

- 3.3.1. Շահութաբաժինները վճարվում են Ընկերության գլխավոր պահուստին հատկացումներից հետո մնացած շահույթից: Ընդ որում, շահութաբաժինները վճարելիս Ընկերությունն առաջնորդվում է նորմատիվային զուտ շահույթից և ֆինանսական հաշվետվությունների միջազգային ստանդարտների համաձայն հաշվարկված զուտ շահույթից նվազագույնով:
- 3.3.2. Շահութաբաժինները վճարվում են ՀՀ դրամով՝ միանվագ կամ մաս-մաս փոխանցում կատարելու միջոցով:
- 3.3.3. Շահութաբաժիններ կարող են վճարվել հետևյալ պայմանների պահպանման դեպքում.
 - ա) առկա է համապատասխան ժամանակահատվածի դրությամբ չբաշխված զուտ շահույթ,
 - բ) իրավասու մարմնի կողմից կայացվել է շահութաբաժինների վճարման որոշում, որով սահմանվել են վճարման ենթակա շահութաբաժինների չափը և ժամկետները,
 - գ) շահութաբաժինների վճարման պահին առկա չէ սույն քաղաքականության 3.2.6 կետում նշված հանգամանքներից որևէ մեկը:
- 3.3.4. Շահութաբաժինների վճարումը իրականացվում է փաստաթղթավորված ձևով՝ համապատասխան գրավոր արձանագրության հիման վրա: Յուրաքանչյուր վճարում պետք է ուղեկցվի վճարման որոշման, բաժնետերերի ցուցակի և հաշվարկի մեթոդաբանության գրավոր փաստաթղթավորմամբ:

4. Շահութաբաժինների վերաբերյալ որոշումներ ընդունող մարմինների միջև իրավասությունների և պարտականությունների բաշխումը

4.1. Շահութաբաժնային քաղաքականության իրականացման նպատակով Ընկերության կառավարման մարմինների պարտականությունները հետևյալն են:

4.1.1 Բաժնետերերի Ընդհանուր Ժողով

4.1.1.1 հաստատում է շահութաբաժինների բաշխման վերաբերյալ որոշումը, վճարման կարգը և դրանց չափի վերաբերյալ որոշումները

4.1.1.2 հաստատում է շահութաբաժինների վերաբերյալ փոփոխությունները Ընկերության կանոնադրությունում:

4.1.2 Խորհուրդը

4.1.2.1 հաստատում է շահութաբաժնային քաղաքականությունը

4.1.2.2 Ընդհանուր ժողովի հաստատմանն է ներկայացնում շահութաբաժինների վերաբերյալ վճարումը, վճարման կարգը և դրանց չափի վերաբերյալ որոշումների առաջարկները

4.1.3 Ընկերության տնօրենը և Ֆինանսական տնօրենը՝

4.1.3.1 Տնօրենը իրավասու է խորհրդին առաջարկություններ ներկայացնել բաժնետոմսերի դիմաց վճարվող միջանկյալ և/կամ տարեկան շահութաբաժինների /ներառյալ՝ դրանց բաշխման/վճարման չափի, կարգի և պայմանների/ վերաբերյալ

4.1.3.2. Ֆինանսական տնօրենը ապահովում է միջանկյալ և տարեկան շահութաբաժինների բաշխման/վճարման ամբողջ գործընթացի համապատասխանությունը Ընկերության իրավասու կառավարման մարմնի (Բաժնետերերի Ընդհանուր Ժողով և Խորհուրդ) որոշմամբ սահմանված կարգին ու պայմաններին /ներառյալ՝ ժամկետներին/, ինչպես նաև սույն քաղաքականությամբ սահմանված պահանջներին:

4.1.4. Բոլոր որոշումները և վճարումները պետք է գրանցվեն համապատասխան առցանց և ֆիզիկական փաստաթղթավորման համակարգերում՝ ապահովելով ամբողջ գործընթացի հստակ վերահսկողությունը և հետագա աուդիտորական ստուգման հնարավորությունը:

5. Եզրափակիչ դրույթներ

5.1 Սույն քաղաքականությունն ուժի մեջ է մտնում Խորհրդի կողմից հաստատվելու օրվանից:

5.2 Քաղաքականությունը ենթակա է վերանայման առնվազն երեք տարին մեկ կամ անհրաժեշտության դեպքում:

5.3 Փոփոխությունները հաստատվում են Խորհրդի կողմից: